



Jens Napātōk', Naleraq
Inatsisartunut ilaasortaq

14-09-2026
Suliap normua 2026 - 16393
Allakap ilisarnaataa
26827762

Postboks 970
3900 Nuuk
Oq. (+299) 34 50 00
Fax. (+299) 34 63 64
Mail: isn@nanoq.gl
www.naalakkersuisut.gl

**Nunanit allanit suliartortartut pillugit § 37 nr. 176 naapertorlugu
apeqqutigineqartunut akissutit**

Asasara Jens Napātōk'.

Inatsisartut Suleriaasianni § 37, imm. 1 naapertorlugu avataaniit suliartortut pillugit Naalakkersuisunut
apeqquteqarputit. Apequt suliassaqaarfigisannit akineqartussanngorlugu innersuunneqarpoq.

**1. Nunatta avataaniit suliartortut killeqanngiusattumik amerliartornerat Naalakkersuisuniit
killiliisinnaaneq eqqarsaatigineqarnerluni?**

a. Qanoq?

b. Suut periutsit suliniutilluunniit atorneqassappat?

**c. Sulisinnaanermut maanilu najugaqarsinnaanermut akuersissutitut maleruagassat
allanngortinneqassappat?**

d. Ilinniagaqassutsimut piumasaqaatit suuppat?

**e. Qanoq nunatsinnut naleqquttumik pisariaqartitatsinnullu naapertuuttunik
aaqqiisoqarsinnaava?**

Akissut:

1-mut)

Kalaallit Nunaanut suliartortartut amerlassusiisa ineriartorneri Naalakkersuisunit malinnaaffigineqarput
nunanillu allanit suliartortartunut tunngassuteqartut ilaasa ineriartorsimaneri arajutsisimanagit.

Nunanit allanit suliartortartut inatsisitigut Danmarkimit akisussaaffigineqarmata suliassamut tassunga
tunngatillugu danskit oqartussaata Naalakkersuisunit ataavartumik oqaloqatigineqartarput.

Peqqinnissaqarfimmut, isumaginninnermut, ilinniartitaanermut atugarissaarnissatsinnullu tunngatillugu
oqartussaaffinni allani sulisussaqaarniarnikkut pisariaqartitsineq annertusiartuinnartillugu avataaniit
suliartortartut killilersornissaat Naalakkersuisunit pilersaarutigineqanngilaq.

Pingaartumik peqqinnissaqarfimmi kommunillu paaqqinnitarfiini sulisoqarniarnikkut unammilligassat
saniatigullu ilinniartinni ilinniartut ilinniarunnaartartut suli taamak amerlatigineri, siunertalinnik
anguniagaqalernissamik pisariaqartitsisoqarneranik ersersitsivoq.

Taamaattumik Naalakkersuisut isumaqarput avataaniit sulisussarsioriaatsit nutartertariaqartut
nunaqavissunillu piginnaanngorsaanerit ilinniartitsinerillu suli annertusarneqartariaqartut.



1a-mut)

Apeqqummut siullermut akissut naapertorlugu pisariaqanngilaq, avataanit sulisussarsiortarnerup killiliiffigineqarnissaanik Naalakkersuisut pilersaaruteqanngimmata.

1b-mut) 1a-mut akissut takuuk.

1c-mut) Sulisinnaanissamut najugaqarnissamullu akuerissuteqartarnermi maleruagassat Inatsisartut 2026-mi upernaakkut ataatsimiinneranni immikkoortoq 42-mi suliarineqarput, tassanilu nunat allamiut pillugit inatsisip Kalaallit Nunaanut tunngasortaata allanngortinneqarnissaanut peqqussutissatut missingiut Inatsisartunit akuerineqarluni. Tamatuma saniatigut danskit oqartussaasui sulisinnaanissamut najugaqarnissamullu akuersissuteqartarnermi ukioq mannarnit akiliuteqartarnek pillugu nalunaarutissamik suliaqarput, Naalakkersuisunit tusarniutitut ukiap ingerlanerani tiguneqarnissaa naatsorsuutigineqarluni.

1d-imut)

Nakorsat, peqqissaasut peqqinnissaqarfimmilu akuerissuteqarnikkut atorfeqartitat allat peqqinnissaqarfimmi sulisussaattillutik akuersissummik pineqartumik pigisaqaaqartariaqartarput.

Suliffinni allani sulisitsisut atorfinitsitsinerminnut atatillugu piginnaasassat eqqarsaatigalugit piumasaqaateqartarput.

Suliffissaq pillugu najugaqarnissamut sulisinnaanissamullu akuersissummik siullermi qinnuteqartup ilinniakkani suliffigisimasanilu ilisimatitsissutigisartussaavai. Suliffimmut neqeroortigineqartumut tunngatillugu qinnuteqartoq ilinniagaqarsimappat tamanna uppersarsarneqartartussaavoq. Najugaqarnissamut sulisinnaanissamullu akuersissutit qinnuteqartunut immikkut piginnaasalinnut aallaaviatigut tunniunneqartarput imaluunniit suliaasaalersussat inuussutissarsiutigiliggassamiluunniit tamanna immikkut piumasarineqartillugu.

1e-mut) Naalakkersuisut isumaqarput Kalaallit Nunaanni suliffeqarnermut tunngasut pitsaasut pilersinnissaanut sinaakkutissat inatsisillu pilersinnissaanut danskit naalakkersuisuunik qanimut suleqateqarnissaq qitiulluinnartoq. Inatsisit nunanut allamiunut tunngasut ilaat danskit inatsisaat aqutigalugit suli aqunneqarmata, inatsisaat Kalaallit Nunaani pissutsinut pisariaqartitanullu immikkut ittunut naleqquttut pilersinneqassappata danskit oqartussaaniq oqaloqateqartarnissaq suleqateqarnissarlugu avaqqunneqarsinnaanngilaq.

Inatsisitigut suliniutissaajunnartut Kalaallit Nunaanni unammilligassanik periarfissanillu aallaaveqartinneqarnissaat Naalakkersuisut ilutigalugu pingaartippaat. Taamaattumik inatsisartuni ilaasortat naalakkersuinnermillu ingerlataqartut allat nunatsinni sulisinnaasunik sulisussarsiortariaatsinik allannguutaasinnaasunik ataavartumik kissaateqarlutillu siunnersuuteqartarnissaat pingaaruteqarpoq.

2. Apeqquut 1-imut tunngasumut, suliartortartunut piumasaqaatinik sukaterinissaq pillugu Naalakkersuisunit pilersaarutigineqarpa?

a. Qanoq, aamma suut piumasaqaatit sukaterneqassappat eqqunneqarlutillu?

Akissut:

Ad 2) Piumasaqaatit sukateriffigineqartariaqarsinnaanissaat Naalakkersuisunit suli isummerfigineqanngilaq. Nunanik allamiunik sulisussarsiortarnermi Fast Track-aaqqissuussap massakkut atuuttup allanngortissinnaanera allanillu piumasaqaateqartoqarsinnaanera Naalakkersuisunit massakkut misissorneqarpoq.

2a-mut) 2-mut akissutigineqartoq takuuk.

3. Sulisartunut nunaqavissunut atugassarititaasut pitsanngorsarneqarnissaat Naalakkersuisunit pilersaarutigineqarpa?



a. Qanoq suullu pitsanngorsarneqarsinnaappat?

Akissut:

3-mut)

Naalakkersuisut sulisoqarnermut periusissiaat 2026-2035 ukiap ingerlanerani saqqummiuppaat. Siunissami sulisoqarnermi atugassarititat tamakkiisumik suliniuteqarnikkut aaqqiiffiqineqarnissaat periusissiami Naalakkersunit erseqqissaatigineqarpoq, suliffeqarnermi atugassarititat pitsaanerusullu pilersinneqarnissaani piginnaanngorsarneq, sulisussarsiortarneq, sulisut sulisoriinnarnissaanut sulisunillu akuutitsisarnerit ataatsimoortillugit isiginiarneqartariaqartassasut.

3a-mut)

Naalakkersuisut oqaatigissavaat, pitsaasunik akissarsiaqartitsinissaq suliffimmilu pitsaasunik atugassaartitsinissaq pisortat kisimik akisussaaffiginngimmassuk. Suliassami uani Suliffeqarnermi illuatungeriit tassalu sulisitsisut sulinermillu inuussutissarsiuteqartut qitiusumik inissisimasussaassapput, isumaqatigiissutit tamanut atuuttut ataavartumillu oqaloqatigiittarnerit aqquutigalugit unammilligassanik suussusersiullaqqinnerussammata sulisartunullu najukkani ataasiakkaani najugalinnut/nunaqavissunut atugassarititaasunik pitsanngorsaatissanik suliaqarlutik.

Taamaattumik najukkani ataasiakkaani sulisartut/nunaqavissut atugaat pitsanngorsaafiginiarlugit suliffeqarnermi illuatungeriit pitsaasumik suleqatigiissinnaanissaat Naalakkersuisunit sulii ikorfartorneqassaaq.

Inussiarnersumik inuulluaqqusillunga

Maritha Broberg.

Inatsisartut suleriaasianni § 37, imm. 1 naapertorlugu Naalakkersuisunut apeqqut imaattoq matumuuna saqqummiuppara:

Naalakkersuisunut apeqqutit:

1. Nunatta avataaniit suliaartortut killeqanngiusattumik amerliartornerat Naalakkersuisuniit killiliisinnaaneq eqqarsaatigineqarnerluni ?
 - a. Qanoq?
 - b. Suut periutsit atorineqassappat?
 - c. Sulisinnaanermut maanilu najugaqarsinnaanermut akuersissut allanngortinneqassava?
 - d. Ilinniagaqassutsimut piumasaqaatit suuppat?
 - e. Qanoq nunatsinnut naleqquttumik pisariaqartitsinnullu naapertuuttunik aaqqiisoqarsinnaava?
2. Apeqqut 1-mut tunngasumut, suliaartortartunut piumasaqaatinik sukaterinissaq pillugu Naalakkersuisunit pilersaarutigineqarpa?
 - a. Qanoq, aamma suut piumasaqaatit sukaterineqassappat eqqunneqarlutillu?
3. Sulisartunut nunaqavissunut atugassarititaasut pitsanngorsarneqarnissaat Naalakkersuisunit pilersaarutigineqarpa?
 - a. Qanoq suullu pitsanngorsarneqarsinnaappat?

(Inatsisartunut ilaasortaq Jens Nap̃tôK', Naleraq)

Tunngavilersuut:

Kalaallit Nunaanni ukiuni makkunani sulisussanik pisariaqartitsineq annertuvoq, taamaattumik inuussutissarsiutit assigiinngitsut iluanni avataaneersunik sulisussarsiortoqartarpoq. Avataaneersunik sulisartunik atuineq pisariaqartinneqarsinnaavoq inuiaqatigiinnullu pitsaasumik iluaqutaasinnaalluni, pingaartumik nunatsinni ilinniarsimasunik imaluunniit immikkut piginnaasalinnik sulisussanik amigaateqartoqartillugu.

Taamaattorli pingaaruteqarpoq ineriartorneq Kalaallit Nunaannut inuiaqatigiinnullu, aningaasaqarnermut kiisalu suliffeqarnermut tunngatillugu pijuartitsinissamut naleqquttumik ingerlanneqassasoq.



Avataaneersunik sulisussarsiortarnerup ingerlaavartumik annertusiartornera ilaatigut inissiatigut pissutsinut, akissarsiatigut sulinermilu atugassarititaasunut, suliffinnik unammilleqatigiinnermut kiisalu nunaqavissut suliffeqarnissamut, ilinniagaqarnissamut aammalu piginnaasanik ineriartortitsinissamut periarfissaannut sunniuteqarsinnaavoq.

Taamaattumik misissorneqartariaqarpoq avataaneersunik sulisartunik atuinnermut tunngatillugu maanna malittarisassat piumasaqaatillu Kalaallit Nunaata immikkut ittumik pissutsitigut pisariaqartitaanut naammattumik naleqqussagaanersut.

Ilaatigut erseqqissarneqartariaqarpoq piginnaasat suut pisariaqartinneqarnersut, aammalu avataaneersunik sulisartut pingaartumik suliassaqaarfinni, nunatsinni pisariaqartinneqartunik sulisussanik pissarsisoqarsinnaannginnerani imaluunniit naammattumik piginnaasalinnik sulisussaqaannginnerani atorineqartarnersut.

Peqatigitillugu qulakkeerneqartariaqarpoq suliffeqarfiit aningaasaqarnikkut iluaqutissarsiniarlutik avataaneersunik sulisartunik nunaqavissunut naleqqiullugit akissarsiatigut imaluunniit atorfinitsitaanermi atugassarititaasutigut ajornerusunik atugassaqaartitsillutik sulisussarsiortannginnissaat. Akissarsiatigut sulinermilu pitsaasunik aammalu naligiissunik atugassaqaartitsineq social dumping-imut akiuiniarnermi aammalu suliffeqarnermi naapertuilluatumik unammilleqatigiinnissamut pingaaruteqarluinnarpoq.

Aammattaaq pingaaruteqarpoq nunaqavissut Kalaallit Nunaanni suliffinnut pioereersunut aammalu suliffinnut nutaanut pilersinneqartunut piukkunnarsarnissamut piviusunik periarfissaqarnissaat. Taamaattumik suliffeqarnermut politikkip piffissaq ungasinnerusoq eqqarsaatigalugu ilinniartitaanermut, ilinniaqqinnermut, piginnaanngorsarnermut kiisalu suliffeqarnermut politikkimut qanimut ataqatigiissinneqarnissaa pisariaqarpoq.

Taamaattumik apeqqutit siunertaat tassaangilaq Kalaallit Nunaat pisariaqartinneqartumik avataaneersunik sulisartunik atuinissamut matuneqassasoq, kisianni Naalakkersuisut sulisussanik pisariaqartitsineq nunaqavissut suliffeqarnermut periarfissaat, inissiatigut pissutsit, akissarsiatigut sulinermilu atugassarititaasut kiisalu Kalaallit Nunaata siunissami aningaasaqarnikkut inuiaqatigiinnilu ineriartornera



eqqarsaatigalugit qanoq oqimaaqatigiissinneqarsinnaanersoq pillugu ataatsimut periusissiaqarnersut paasinarsisinniarneqarpoq.

Apeqqutigineqartut ullut suliffiusut qulit (10) iluanni allakkatigut akineqareersimanissaat piumasarineqarpoq. Oqaatsinik nutserisimanermi paatsuungasoqassatillugu kalaallisut allassimasoq aallaavigineqassaaq.